

四庫全書

史部

欽定四庫全書

皇朝文獻通考卷二百二十二

經籍考 十二

史 載記 史評 史鈔 政書 職官

臣等謹按古者偏方割據僭號紀年各設史官以紀事迹後人論定因以霸偽目之馬端臨兼用阮孝緒七錄隋經籍志之名輯為一類然其書實皆後人追記非其舊作偽霸之號似是實非此四庫

全書據東觀漢記晉書等改題載記義至善也今  
遵此例編輯如左

南唐拾遺記一卷

毛先舒撰先舒見經類

先舒自述曰是書畧採宋江南遺事諸不見正史  
者附于馬陸二書鄭文寶近事陳彭年別錄陳霆  
唐餘記傳之後

十六國年表一卷

張愉曾撰愉曾字庭碩徽州人

張潮跋曰崔鴻十六國春秋不識何以不列年表  
今得此書可以補其缺畧

十國春秋一百十四卷

吳任臣撰任臣字志伊仁和人康熙己未

召試博學鴻詞授翰林院檢討

十六國年表二十二卷

孔尚質撰尚質字元長武陵人

右載記

臣等謹按麟經筆削游夏不能贊一辭自史記作而班固復異議焉此史評所以日繁也孔子刪帝魁以後書為百篇實史鈔之權輿厥後鈔節以而論說多晁公武讀書志嘗論之不知二者原相表裏故端臨通考並存而不廢惟於一門之中雜見而無區別于義未善茲故遵四庫全書之例各以類從庶編次不致紊雜云

御批通鑑綱目五十九卷通鑑綱目前編十八卷外紀一卷舉要三卷通鑑綱目續編二十七卷

康熙四十七年吏部尚書宋犛奉

敕校刊

聖祖仁皇帝御製序曰朕惟自古帝王言動必記而史事以興顧周禮外史所掌卷帙寔繁即紀傳亦異千百年來微言大義昭揭天壤必以尼山筆削為斷所從來尚矣粵自龍門而降累朝國乘體製畧同涑水司馬氏易

分類為合編蓋猶左氏法也紫陽朱子特起而振舉之  
綱以提要目以備詳歲時列于上而天統明章程繫于  
下而人紀立增損精切予奪謹嚴庶幾春秋大居正之  
宗指歟雖其間事理彙括稍有脫誤大都門人一時采  
輯之過實非晦庵本意也自時厥後有前編有外紀有  
大紀續編以及考証集覽發明質實之類諸家論著不  
一而足要皆商確折衷互相參訂明儒陳仁錫哀集而  
剖劂之不可謂非先哲之功臣也朕幾務之暇留神披

閱博稽詳考織悉靡遺取義必抉其精微辭必搜其奧  
析疑正陋釐異闡幽務期法戒昭彰質文融貫前後所  
著論斷凡百有餘首茲允諸臣請並以付梓頒布宇內  
俾士子流傳誦習開卷瞭然不特天人理欲之微古今  
治忽之故一一臚如指掌即子朱子祖述宣尼維持世  
教之苦衷並可潛孚默契于數千載之下是則朕敦崇  
古學作新烝民之至意也爰敘述以冠篇端用昭示於  
無窮焉



臣等謹按朱子因司馬光資治通鑑作綱目綱做  
麟經目做左氏其門人依所手定之凡例而成後  
有伊起莘之發明劉友益之書法王幼學之集覽  
徐昭文之考證陳濟之集覽正誤馮智舒之質實  
汪克寬之考異皆自為一書明黃仲昭取諸家之  
書散入各條之下特取其便于披覽

國朝張自勳始作綱目續麟為長恤作綱目指遺則  
又各執私見以相爭我

聖祖仁皇帝睿斷精詳即取陳仁錫刊本

親加評定因羣言之淆亂悉舉而釐正之又金履祥病劉  
恕通鑑外紀嗜博而好奇乃蒐採經傳起帝堯迄  
周威烈王作通鑑前編又括全書綱領撰為舉要  
復冠之以外紀一編陳仁錫改題通鑑綱目前編  
與綱目合刊以補朱子所未及至商輅等通鑑綱  
目續編因朱子凡例紀宋元兩代之事明人亦有  
發明廣義附於條下今于前編則仍其舊本

御筆特加品題其續編雖議論膚淺考訂粗疎亦因陳仁錫既綴刊綱目之末均得上邊

乙覽并示

別裁不特綱目全書頓易舊觀而于得失之互見瑕瑜之錯出者訂正秩然絲毫不爽尤足以開千古讀史者之心目云

御製評鑑闡要十二卷

乾隆三十六年大學士劉統勳等奉

敕編錄

臣等謹按前館臣恭纂通鑑輯覽時分卷屬稿排

日進

呈

皇上親加評騭隨條發論法戒昭然其有

敕館臣撰擬黏簽同進者皆蒙

睿裁改定塗乙增損十存二三全書既成凡數千條皆

刊刻簡端茲復甄輯此書凡分卷十二計恭錄

御批七百九十八則罔不

訓示精詳折衷至當如賈充褚淵等之書死狄仁傑之  
書周正南北稱寇之文訂遼金元人名官名地名  
之誤而紀年系統闕于保邦凝命之原者尤再三  
申誠將是非不爽於毫釐即曲說無由而置喙俾讀者  
既博觀于輯覽又得闡要而約守之洵足以

垂教萬世而無窮矣

漢史億二卷

孫廷銓撰廷銓見傳記類

廷銓自序曰荀悅漢紀詳約得中次序有意披讀所到偶有觸輒書數語用備遺忘與于東阿讀史漫錄意義暗合者什一亦不去也

論世八編十二卷

華慶遠編慶遠無錫人

慶遠自序曰是書畧似竟陵鍾氏史懷或正史或野史或集或說不專一史久之盈冊題曰寒牕嘆

後改名為論世八編

歷代甲子考一卷

黃宗羲撰宗羲見經類

臣等謹按此編本宗羲與朱朝瑛之書因曹溶收  
入學海類編改題今名所論史記甲子與尚書不  
合謂當從班史反覆詳辨多所引證

鑑語經世編二十七卷

魏裔介撰裔介見經類

讀史吟評一卷 史評辨正四卷

黃鵬揚撰鵬揚字遠公晉江人順治丁酉舉人官知縣

讀史醫疑十卷

張彥士撰彥士字龍弼定陶人順治初歲貢生官黃縣訓導

史折三卷續一卷

賀裳撰裳字黃公丹陽人康熙初諸生



白雲山人三言  
卷二百二十二  
澂景堂史測十四卷

施鴻撰鴻字則威邵武人康熙中歲貢生官奉天府經歷

鴻自述曰歲在甲辰署篆羅源未攜書籍借得溫公通鑑自晉至隋數十冊日夜讀之因而有所論議輯為是編

垂芳世型十三卷

金維寧撰維寧字德藩華亭人康熙丙午舉人

資治通鑑述

無卷數

陳詵撰詵見經類

通鑑大感應錄二卷

秦鏡撰鏡字非臺翼城人

鏡自序曰資治通鑑乃古今來一大感應篇錄其

彰明較著者俾覽之者有所觀感焉

讀史辨惑

無卷數

王建衡撰建衡號月蘿威縣人歲貢生候選教諭

史論初集

無卷數

朱直撰直字少文江蘇人

詩史十二卷

葛震撰震字星巖句容人

班范昉截四卷 五代史昉截四卷

張篤慶撰篤慶字懋友號厚齋又號崑崙外史淄

川人康熙丙寅拔貢生

增定史韻四卷附讀史小論一卷

仲宏道撰宏道字開一嘉興人

十七史論九卷年表一卷

夏敦仁撰敦仁字調元武進人

芝壇文案五卷

張鵬翼撰鵬翼字警菴連城人

史通訓故補二十卷

黃叔琳撰叔琳見經類

凡例曰唐劉知幾作史通以前代書史敘其體法

因習廢置掇其得反述作曲直分內外篇著為評  
議舊鮮訓釋惟江西郭延年所註盛行而援引躋  
駁每多紕繆河南王惟儉更註之名曰訓故依據  
正史選擇精嚴遠勝郭書然失之太簡未免遺漏  
叔琳旁搜博採廣所未備其或註意與本書不相  
比附或闕而不註或註而不全或相沿錯誤並經  
改正

史通通釋二十卷

浦起龍撰起龍字二田無錫人雍正庚戌進士官  
蘇州府教授

起龍自述曰趣乖者法宜訓正疵積者道在刊譌  
訓正之科其別六曰釋曰按曰證釋曰證按曰夾  
按曰雜按刊譌之科其別四曰字之失曰句之失  
曰節之淆曰簡之錯編始于乾隆乙丑至戊辰書  
成梓行

史學正藏五卷

宋士宗撰士宗字司秩星子人雍正丙午舉人

讀史評論六卷

費宏灝撰宏灝號愚軒湖州人

十七朝史論一得一卷

郭倫撰倫見雜史類

石溪史話八卷

劉風起撰風起字蘭村睢寧人

唐鑑偶評四卷

周池撰池字商濂湖口人

臣等謹按是書雖名唐鑑然于有唐一代實未完備第上起高宗之上元元年下迄武宗之會昌四年蓋池嘗讀通鑑綱目評其得失而未及成書者也

右史評

左傳經世十卷

魏禧撰禧字永叔寧都人



臣等謹按是書不主解經論文惟以推識成敗考鑒得失為事故以經世名編其間畧取杜林之注又復雜採諸說綴以評語

讀史蒙拾一卷

王士祿編士祿字子底號西樵新城人順治壬辰進士官至吏部考功司員外郎

史緯三百三十卷

陳允錫編允錫字疊齋晉江人順治己未以薦舉

授平湖縣知縣

兩晉南北集珍六卷

陳維崧撰維崧字其年宜興人康熙己未

召試博學宏詞授翰林院檢討

左傳分國纂要十六卷

盧元昌撰元昌字文子華亭人康熙中諸生

南史識小錄八卷北史識小錄八卷

沈名蓀朱昆田同編名蓀字澗芳錢塘人昆田字

文益秀水人

兩漢蒙拾五卷

杭世駿撰世駿見經類

臣等謹按世駿掇取兩漢文疑義詮釋昭晰迥異  
餽訂庶幾抉摘微奧得史家識小之遺

右史鈔

臣等謹按馬端臨通考列故事一門於職官之上  
然故事之義後鑒前師與時損益似屬之前代為

宜夫史家著錄自有體裁隋志載漢武故事濫及  
稗官唐志載魏文貞故事橫牽家傳則于國政朝  
章之所係其義類尤為乖誤我

國家右文垂獻酌古宜今凡準制度于六官貽規模  
于億載所謂文武之政布在方策煌煌乎誠今日  
之

盛典也故事之名毋庸沿習考錢溥秘閣日錄有政  
書一類四庫全書據以標目謹依此例以符周官

立政之遺義焉

欽定大清會典一百卷

欽定大清會典則例一百八十卷

乾隆二十九年和碩履親王允禔大學士傅恒等  
奉

敕撰

皇上御製序曰自

郊

廟朝廷放之千百國徼荒服屬之倫而莫之偕

創業守文繩之億萬葉矩矱訓行之久而勿之渝非會典

奚由哉顧惟自

聖作

明述政府棊陳其間有因者即不能無損與益而要之悉  
損益以善厥因則方策所麗乃一成不易之書非閱  
世遞輯之書也國家膺

大寶命

列聖肇興禮樂明備

皇祖聖祖仁皇帝康熙二十三年

始敕釐定會典則以時當大業甫成實永肩我

太祖

太宗

世祖三朝之統緒不可以無述而述固兼作矣

皇考世宗憲皇帝雍正五年

申諭閣臣敬奉

成編攷衷條系則以累洽重熙更兼

皇祖景祚延洪化成久道不可以無述而述且未遑言作

矣暨朕寅紹

丕基祇祇翼翼壹惟法

祖宗之法心

祖宗之心發冊披圖罔或徇隄尺寸會西陲大功告蕝幸

續承

祖宗欲竟之



志事而凡職方官制郡縣營戍屯堡覲饗貢賦錢幣諸大  
政於六曹庶司之掌無所不隸且我

皇考勵精圖治十三年之間立綱陳紀復不可無紀以垂  
永世爰涖館局次第具草乙夜手披是正而諭之曰  
嚮者發凡排纂率用原議舊儀連篇並載是典與例  
無辨也夫例可通典不可變今將緣典而傳例後或  
撫例以淆典其可乎於是區會典則例各為之部而  
輔以行諸臣皆謂若網在綱咸正無缺而朕弗敢專

也蓋此日所輯之會典猶是我

皇祖

皇考所輯之會典而俛焉從事于茲者豈直義取述而不作云爾哉良以抱不得不述之深衷更推明不容輕述之微指稽典者當瞭然知宰世馭物所由來無自疑每朝迭修為故事耳若夫治法心法表裏兼賅精之而貫徹天人擴之而範圍今古如往牒所稱惟睢麟足以行官禮者是又數典之原嘉會之本也朕其

敢不懋諸敢不與子孫臣民交勗諸

臣等謹按

國朝會典康熙三十三年初修雍正五年續修至是  
凡三經釐定典章條目燦然大備矣昔周禮一經  
稱為周公致治之書故傳之萬世尊為法守至歷  
代所傳如唐六典元典章明會典雖法制遞有增  
損而所謂以官統事以事隸官者不易焉夫編纂  
之工拙繫乎政令之廢修我

國家

列祖相承

聖德神功昭垂瀛海

規畫既皆盡善我

皇上勵精圖治執兩用中化裁皆衷乎道增刪悉合乎  
宜則是書之體裁精密若網在綱足以方駕周禮  
者皆實政有以制之固不徒以意為增損也至則  
例原本散附各條之下猶沿舊體今則各為編錄

俾大綱細目互相經緯條理益明即如周禮六官所職一代之典制在焉而度數節文則往往見於他說蓋當時故府所記諒不一書皆與六典相輔而行今則以會典為不變之大經而則例繁多可以隨時損益之正與三代之古義同符是書也即以仰窺

皇心之運量無窮文武張弛胥於是乎在又豈徒備掌故而已哉

欽定續通典一百五十卷

乾隆三十二年奉

敕撰

臣等謹按是書所續自唐肅宗至德元年訖明宗  
禎末年篇目一仍杜氏之舊然其間稍有不同者  
杜氏以兵制附刑後今則兵刑各為一篇亦倣周  
禮夏官秋官之例至于畧者詳之繁者節之則以  
唐代年祀稍遠舊典尠徵五代及遼史書太畧故

旁搜圖籍以備叅稽明則見聞最近宋金元亦多有遺漏則精別是非以昭傳信凡皆稟

裁成之妙酌繁簡之中條分件繫覺九百七十八年內之典制謨猷瞭如指掌洵乎提要鉤元非杜氏所  
能及矣

欽定皇朝通典一百卷

乾隆三十二年奉

敕撰

臣等謹按是書以八門隸事其中條例酌為變通如錢幣之附食貨馬政之附軍禮兵制之附刑法于理相通者則仍其舊至于古今異制不可強同如食貨典之權酤算緡禮典之封禪皆當時變政聖代盡為刪除豈宜更存虛目又地理一門舊典以統括歷代其中分併靡常沿革互異故以九州提綱今則六合同風販章孔厚區區九州舊界豈足盡職方之所掌故均以



大清一統志為斷至于

列聖鴻猷

皇上令典史不勝書宜乎卷目之繁溢于舊典也

欽定皇朝通志二百卷

乾隆三十二年奉

敕撰

臣

等謹按鄭樵通志列二十畧是書分目相同而

紀傳年譜則畧而不作益

寶錄

國史尊藏金匱與攷求前代刪述舊文義例固不侔也至二十畧中視原本汰其冗雜者凡三補其踈漏者凡二刪併其瑣屑者凡三廣益其未聞者凡三博證詳蒐獨昭羨備又是編名雖通志然紀傳既從其闕實與通志通考為類故從四庫全書之例恭列於政書中焉

欽定吏部則例六十六卷

乾隆三十七年大學士公傅恒等奉

敕纂

臣等謹按各部則例每十年奏請纂修一次吏部

則例自乾隆三十二年修竣後尚未刊刻復加增纂輯成是編凡品級考六卷銓選則例十三卷處分則例四十七卷書成刊布

元朝典故編年考十卷

孫承澤撰承澤見經類

右政書類通制

幸魯盛典四十卷

康熙二十三年襲封行聖公孔毓圻等恭述

聖祖仁皇帝御製序曰朕惟自古帝王聲教翔洽風俗茂  
美莫不由於崇儒重道典學右文用能發詩書之潤澤  
宣道德之闡奧推厥淵源皆本洙泗以故追崇之典歷  
代相沿或躬詣闕里修謁奠之儀潔志肅容盡誠備物  
其間禮數隨世損益至于希風服教百代式型異世同

揆莫之或二猗歟盛矣朕臨御以來垂三十載溯危微  
之統緒念生安之聖哲恒慮涼薄未克祇承用是夙夜  
單心孜孜不倦惟我至聖先師孔子配天地參陰陽模  
範百王師表萬禩朕每研搜至道涵泳六經覺憲章祖  
述刪定贊修之功日星揭而江河流私心向往竊有願  
學之志焉乃者東巡踰泰岱涉泗沂遂詣闕里親行釋  
奠得瞻廟貌仰聖容以為德盛功隆欽崇宜極凡厥典  
禮有加前代又親製文辭手寫以勒之貞石務用導揚

至教風示來茲夫緬懷曩哲繼躅前賢猶思覩其物采  
接其居處况先師遺風餘烈久而彌新重以朕之寤寐  
羹牆儉乎如見及過杏壇相圃之間山川儼然檜楫如  
故髣髴金石絃誦之聲聞於千載而上流連往復不能  
自己也衍聖公孔毓圻上疏陳謝且以禮儀隆重非直  
一家榮遇請修幸魯盛典一書朕既可其奏久之書成  
復請叙言以冠其端朕萬幾餘晷敦勉弗遑實欲默契  
先師尊聞行知於以阜物誠民風同道一庶幾躋世運

於唐虞登治術於三古是書也豈徒使天下後世知朕於先師欽慕無已如此且愈以見聖人之道覆幬羣倫苞毓萬象即凡車服禮器之遺皆足令人感發而興起也故賜之序

臣等謹按康熙二十三年

聖駕東謁

闕里展祀

廟庭留

寶織以明虔鑄豐碑而誌盛並各

製宸章勒石于周公孟子之廟錄聖賢後裔給以世官俾

奉祠祀

帑金優發廟貌聿新毓圻以

聖天子尊師隆軌超邁古今宜勒為成書以垂永久得

旨俞允書成奏進復蒙

訓示改定刊行凡事蹟二十卷藝文二十卷自有書契以

來未有



褒崇聖教加禮

先師若斯之隆者已

萬壽盛典一百二十卷

康熙五十二年戶部侍郎王原祁等奉

敕恭輯

臣等謹按是編凡六目曰

宸藻曰

聖德曰典禮曰

恩賚曰慶祝曰歌頌備述率土嵩呼之盛實極古今未有  
之隆又冠以宋駿業等繪圖二卷摹寫極工纖悉  
具備垂諸冊府共仰見

聖祖仁皇帝久道化成敷天懽洽蓋由

深仁厚澤浹髓淪肌故一時抃舞謳吟之盛直軼乎衢歌

華祝之休焉

欽定大清通禮五十卷

乾隆元年奉

敕撰

皇上御製序曰伊古承天之道治人之情莫善乎禮顧其為用往往詳于朝廟畧于鄉閭及攷儀禮十七篇所紀獨多士禮自后蒼有推而達之之說儒者奉為本經其等差節度互見于周官戴記然時有牴牾朱子嘗建議請修通解而未既厥業信乎完書之難而行典禮觀會通章志貞教經世者所宜重也經禮三百曲禮三千會典蓋經禮之遺矩而通禮亦曲禮之

濫觴朕臨御之初敕儒臣蒐訂前聞折衷令甲準時  
會之宜衡質文之紀釐為全帙用詔方來越歲己卯  
排纂裁就寧詎謂副在有司執以莅事而已哉蓋嘗  
深維大順大同之化初不越納身軌物與天下共之  
焉耳三代以下漢稱近古觀叔孫通之朝儀公玉帶  
之明堂不過椎輪楛具後此如唐開元禮宋太常因  
革禮元通禮明集禮取足徵一朝掌故迨承用日久  
俗尚駁尋精意遠而敝劫隨之既苟簡慢易而無以

稱其情甚且改錯徧規敢于侈汰而冒其上故禮之通也于是乎始難六經之士雖欲闡教正俗然居下不獲若考亭家禮涑水書儀黨塾間以為免園陳策其事不闕功令故禮之通也于是乎尤難是編也約而賅詳而不縻圭臬羣經羽翼會典使家誦而戶習之于以達之人倫日用之間興孝弟而正風俗則朕淑世牖民之意或在斯乎或在斯乎因禮官之請爰為序以諗其端

臣等謹按通禮與會典相為表裏奉

詔編纂同會典次第進呈卷首恭紀

朝

廟大典凡通行儀制各依類分附其中貴賤之等差節目  
之先後器物之名數陳設之方位纖悉畢具考訂  
綦詳書成

賜名曰通禮洋洋乎酌于今古之宜達之上下而準鴻  
網細目具有規程蓋我

皇上以聖人之德居

天子之位宜乎酌中立制遠邁周官儀禮之經也已

欽定國朝宮史三十六卷

乾隆七年奉

敕撰二十四年增修

臣等謹按是編首

訓諭次典禮次宮殿次經費次官制次書籍凡六門我

皇上服膺

祖訓綱紀修明猶復

異命重申輯成是帙所以垂

鴻規于億禩紹

家法于萬年者抑何深切而著明也歟

欽定滿洲祭神祭天典禮六卷

乾隆十二年奉

敕撰

臣等謹按我



國家肇造以來祀典攸垂聿昭誠懇惟是口耳相傳  
不無小異我

皇上欽崇寅畏昭事惟虔

特命王公大臣詳明攷訂定著成編首祭儀二篇次彙  
記故事一篇次儀注祝詞贊詞四十一篇殿以器  
用數目圖式各一篇皆由

聖明釐正典則精詳乾隆四十二年復

命依文音釋與通禮相輔而行蓋崇德報功之典至是

而燦然大備矣

欽定皇朝禮器圖式十八卷

乾隆二十四年奉

敕撰

皇上御製序曰五禮五器之文始著虞書若璣衡若作  
繪締繡若笙鏞祝嘏粢乎具列迨成周攷工記乃詳  
載廣圍尺度與夫方色鈞鈺園匡縝疏侈弇之差說  
者謂器之有圖實權輿是漢儒言禮圖者首推鄭康

成自阮謨梁正夏侯伏明輩均莫之逮宋聶崇義彙  
輯禮圖而陸佃禮象陳祥道禮書復踵而穿穴之其  
書幾汗牛充棟然嘗念前之作者本精意以制器則  
器傳後之述者執器而不求精意則器敝要其歸不  
出臆說傳會二者而已我朝

列聖相承法物修明折衷大備惟是敬

天尊

祖頒朝詰戎之典弗懈益虔第所司展事具儀間沿前代

舊式方名象數時有未協爰諏禮官自

郊壇祭器及鹵簿儀仗輦輅以次釐正至冠服以彰物采  
樂器以備聲容宜準彝章允符定則而觀象臺儀器  
自

皇祖親定閱數紀于今度次不免歲差又武備器什有舊  
會典未經臚載者皆是範是程進御審定於以崇飭  
祀饗朝會軍旅諸大政顧弗蒼萃成帙慮無以垂光策府  
于是按器譜圖系說左方區為八部用付剖劂俾永

其傳夫邊豆簋簠所以事

神明也前代以盃盤充數朕則依古改之至于衣冠乃一代昭度夏收殷嗔本不相襲朕則依我朝之舊而不敢改焉恐後之人執朕此舉而議及衣冠則朕為得罪

祖宗之人矣此大不可且北魏遼金以及有元凡改漢衣冠者無不一再世而亡後之子孫能以朕志為志者必不惑于流言于以綿國祚承

天佑於萬斯年勿替引之可不慎乎可不戒乎是為序

臣等謹按是書分祭器儀器冠服樂器鹵簿武備  
六門左系論說右方為圖凡形模品質度數采章  
無不一一臚陳罔失累黍蓋據器為圖不比阮謚  
聶崇義等之揣摩彷彿予以奉

清廟而薦馨香垂成憲而昭法守

聖世鴻規宜乎立隆萬古也

南巡盛典一百二十卷

乾隆三十一年大學士管兩江總督高晉等恭述  
皇上御製序曰南巡盛典之作非朕志也兩江總督高  
晉輯書既成始以入告念已成事不可止第南巡所  
經非獨江南也若他省踵為之不益繁且贅乎遂下  
軍機大臣議則請令浙江山東直隸督撫錄其事系  
南巡者裒付高晉都為一書斯體備而文省乃俞之  
越歲而薈纂歲事復郵進以序請朕惟南巡之典亦  
適率我

皇祖成憲祇奉

慈寧宣祺導豫而民隱遐阻以勤以安不自暇逸迺肇自  
冀兗達于淮海之域溯乾隆辛未以暨乙酉蓋四莅  
焉於凡風土之物宜吏治之善否民生之利病既諏  
覽而規措之而所在耆庶婦孺臚懽祝

釐前于後喁跚頂相望繫茲林總親愛之誠每見益摯然  
敬惟

聖母春秋高而江浙經涂數千里頓置煩數非所以適



頤養也爰于四巡迴蹕時面敕東南諸大吏勿更以南巡  
額亦既衆喻之矣輯書者顧因是有言曰曩者鑿輅  
時至慶惠迭行淪浹肌髓茲臣民顛跂懇款既弗克  
申則鴻典茂儀非是莫紀愷澤良政非是莫著碩畫  
深遠非是莫循大文炳鑠非是莫備予曰不然朕法  
祖省方承

志尊養惟其實不惟其文若夫慶賜所頒治要所舉咨度  
所周罔不布在詔令洽于人心而觀風察聲以時賡

識大者揭諸石餘亦錄詩文各集中尚不欲與文士  
競短長奚以是敷陳抗擢為哉惟是兪河遵海係于  
澤國民寧者綦鉅朕親履相度定清口水誌以衛下  
河培海塘坦簏以驗沙漲與夫徐州之隄微湖之埝  
及諸河防興作皆斬于灑澹康乂綜而編輯之俾有  
司知所稽式亦固其宜且使諸有土大小吏憬然于  
巡守本意各慎厥職阜厥民不啻朕之入疆考詢毋  
忘毋怠而朕幾暇披覽及之亦不啻蒼赤之瞻就依

懋時在目前則是書又未嘗不可作然朕之志實在  
彼而不在此序而付之剞劂則從

皇祖序幸魯盛典例也

臣等謹按乾隆辛未至乙酉

六御時巡

四臨江浙首厘海塘防築湖河疏蓄之方次慰東南都

會臣民延跂之望率

祖攸行裒時之對維時

省耕問俗行慶施仁即罄竹恭書豈能殫述晉等畧陳  
梗概已勒鴻編荷蒙

賜製序文俾付剞劂迄今庚子甲辰復經  
兩幸行見新編續纂益增

盛典之光也已

欽定禮部則例一百九十四卷

乾隆四十九年禮部尚書德保等奉

敕纂

臣等謹按禮部則例自乾隆二十九年纂修後嗣經欽奉

諭旨及內外臣工條奏議准得

旨允行者積至六百餘條德保等奏請續纂輯成是編  
奏

御刊布

欽定學政全書八十卷

乾隆三十九年理藩院尚書署禮部尚書素爾納

等奉

敕纂

臣等謹按原書自乾隆五年奉

詔纂輯續增至二十年嗣因條例尚簡未經博分門類  
詳細釐折于現行事例多有參差乃重輯是編奏

御刊布

學典三十卷

孫承澤撰承澤見經類

文廟從祀先賢先儒考一卷

卽廷極撰廷極鑲黃旗漢軍人官至江西總督

類宮禮樂全書十六卷

張安茂撰安茂字蓼匪松江人順治丁亥進士官

至浙江提學僉事

琉球入

太學始末一卷

國朝謚法考一卷

王士禎撰士禎見傳記類

歷代建元考二卷

鍾淵映撰淵映字廣漢秀水人

北郊配位議一卷 辨定嘉靖大禮議二卷 制科雜錄

一卷

毛竒齡撰竒齡見經類

臣等謹按康熙二十四年太常寺卿徐元珙奏現

行祀典



北郊既改北向而

三祖配位仍首東次西請

旨酌改竒齡時官檢討因撰此書以斤漢元始儀惑于曲禮之文詳明反覆申明以東為上之義其辨定嘉靖大禮議一編力詆楊廷和之說又不拾張璉桂萼之緒餘辨論頗為典確

廟制圖攷一卷

萬斯同撰斯同字季野鄞縣人

彙征錄一卷

不著撰人名氏

國學禮樂錄二十四卷

李周望謝履忠同撰周望字渭湄蔚州人康熙丁丑進士履忠字方山昆明人康熙癸未進士

臣等謹按是編輯孔子世系先賢先儒列傳及歷代祀典禮樂圖譜并石鼓潘迪音訓而終之以祭酒司業題名所列頗多疎謬徵引亦未免稍畧

紀元彙考三十五卷

黃琳撰琳見經類

聖門禮樂統二十四卷

張行言撰行言字躬先江浦人

學宮備考十卷

彭其位撰其位字素君吳縣人

四譯館考十卷 太常紀要十五卷

江蘩撰蘩見奏議類

紀元要畧二卷補遺一卷

陳景雲撰景雲見編年類

景雲自述曰年號始自漢武故纂始於漢并及高  
惠文景者欲備一代始末也三國南北朝國各有  
史宋遼金元亦四史並傳故所纂各繫以國不統  
于一而于本國改元下仍分注歷國年號以便參  
考至歷代興廢大畧與享年之修短亦附載焉

歷代帝王年號二十卷

劉宗魏撰宗魏字友韓號袖航贛州人乾隆戊辰  
進士官至監察御史

右政書類儀制

欽頒賦役全書

不分卷

世祖章皇帝御製序曰朕惟古帝王臨御天下必以國計  
民生為首務故禹貢則壤定賦周官體國經野法至備  
也當明之初取民有制休養生息至萬歷年間海內殷  
富家給人足及乎天啟崇禎之世因兵增餉加派繁興

貪吏緣以為奸民不堪命國祚隨之良足深鑒朕荷

上天付託之重為生民主一夫不獲亦疚朕懷凡服御膳  
羞深自約損然而

祖宗百神軍旅燕饗犒錫之繁以及百官庶役餼廩之給  
罔不取之民間誠恐有司額外加派豪蠹侵漁中飽民  
生先困國計何資茲特命戶部右侍郎王弘祚將各直  
省每年額定徵收起存總撤實數編撰成帙詳稽往贖  
參酌時宜凡在參差遺漏悉行駁正錢糧則例俱照萬

欽定四庫全書

皇朝文獻通考  
卷二百二十二

三九

歷年間其天啟崇禎時加增盡行蠲免地丁則開原額若干除荒若干原額以萬歷刊書為準除荒以覆奏御旨為憑地丁清核次開實徵又次開起存起運者部寺倉口種種分析存留者款項細數事事條明至若九釐銀舊書未載者今已增入宗祿銀昔為存留者今為起運漕白二糧確依舊額運丁行月必令均平胖襖盛甲昔解本色今俱改折南糧本折昔留南用今抵軍需官員經費定有新規會議裁冗改歸正項本色絹布顏料

銀珠銅錫茶蠟等項已改折者照督撫題價值開列解  
本色者照刊書價值造入每年督撫確察時值題明填  
入易知單內照數辦解更有昔未解而今宜增者有昔  
太冗而今宜裁者俱細加清核條貫井然後有續增地  
畝錢糧督撫按彙題造冊報部以憑稽核綱舉目張勒  
成一編名曰賦役全書頒布天下庶使小民遵茲令式  
便于輸將官吏奉此章程罔敢苛斂為一代之良法垂  
萬世之成規雖然此其大畧也若夫催科之中富以撫



字廣招徠之法杜欺隱之奸則守令之責也正已率屬承流宣化覈出納之數慎挪移之防則布政司之職也舉廉懲貪興利除害課殿最於荒墾昭激揚于完欠恪遵成法以無負朕足國裕民之意則督撫之責有特重焉其敬承之毋忽

臣等謹按是編始於順治十一年至十四年書成刊布嗣後陸續纂增篇目日富

御定康濟錄四卷

乾隆四年吏科給事中倪國璉恭進

臣等謹按是編四門一前代救援之典二先事之政三臨事之政四事後之政末以摘要備觀賑粥須知捕蝗必覽社倉條約附焉仰見

皇上軫念民依無時或釋芻蕘可採真不遺乎一善也  
欽定戶部則例一百二十六卷

乾隆四十一年大學士于敏中等奉

敕纂

臣等謹按戶部向無則例創始乾隆二十六年至四十一年告成奏

御刊布嗣是五年一修如刑部律例館之例

淮鹺本論二卷

胡文學撰文學見奏議類

歷代茶權志一卷

蔡方炳撰方炳字九寰號息關崑山人

蘇松歷代財賦考一卷

不著撰人名氏

臣等謹按是編歷紀明代蘇松財賦之重後恭錄

世祖章皇帝

聖祖仁皇帝歷年蠲欠減額諸

聖諭并及巡撫韓世琦等奏疏仰見我

朝自

列聖以來莫不子愛元元所以

推恩沛澤者至再至三彼東南士女孰不歌咏昇平而效

康衢擊壤之風哉

捕蝗考一卷

陳芳生撰芳生字漱六仁和人

荒政叢書十卷

俞森撰森號存齋錢塘人由貢生官至湖廣布政  
司參議

歷代山澤征稅紀一卷

彭寧求撰寧求字文洽長洲人康熙壬戌進士官

至左春坊左中允

左司筆記二十卷

吳暲撰暲字西齋太倉人康熙戊辰進士官給事中

暲自識曰時官戶部者稱廣東山西二司為左右  
二大司暲適官廣東司而所撫拾多一曹遺事故  
以左司筆記名書

泉刀滙纂

無卷數

邱峻撰峻字晴岩仁和人

錢錄十二卷

張端木撰端木字崑喬上海人乾隆壬戌進士官

諸暨縣知縣

右政書類邦計

欽定八旗通志初集二百五十卷

雍正五年大學士鄂爾泰張廷玉等奉

敕撰

皇上御製序曰粵稽古唐虞封山濬川命官敷教諸大政具載典謨而禹貢周官尤詳于方域官制聖人列之于經所以著一代之憲章垂奕世以法守經邦立政惇典善俗必於茲取則焉我國家受

天景命

太祖高皇帝龍興東土創造鴻基肇建八旗以統滿洲蒙古漢軍之衆規模宏遠立極萬世

太宗文皇帝繼緒膺圖遐邇率服輸誠歸附者雲集景從



咸隸旗籍以固根本

世祖章皇帝統一寰宇定鼎京師詳定規制體統嚴明建  
置周密重以

皇祖

皇考德澤涵濡休養訓迪明禮制興學校廣儲蓄典章日  
益明備益自開創以來百有餘年

列聖相承經畫盡善而且响之以天地之恩篤之以家人  
父子之親隆之以肺腑腹心之寄英藩碩輔宿將名

臣佐命宣猷銘鼎鐘而耀竹帛者後先相望下逮卒  
徒韋布亦共識尊君親上之大義節孝忠烈有不待  
勉強而出於至性者雖邠岐豐鎬之遺風豐沛南陽  
之故舊曷以加茲顧其事散見于

實錄會典諸書未有專紀雍正五年

皇考命儒臣纂輯八旗志書昭示永久乃採撫彙集撰為  
八志曰旗分曰土田曰營建曰兵制曰職官曰學校  
曰典禮曰藝文次以八表曰封爵曰世職曰八旗大

臣曰宗人府曰內閣大臣曰部院大臣曰直省大臣  
曰選舉次以列傳曰宗室王公曰名臣曰勲臣曰忠  
烈曰循吏曰儒林曰孝義曰烈女越乾隆四年書成  
凡二百五十三卷於是而

列祖創垂之緒損益之宜與夫人物殊尤之跡臚舉條分  
燦然具備與國史相為表裏然是書之作非徒以廣  
紀載備圖籍已也監成憲則思所以遵守而修明之  
覽風俗則思所以董勸而振作之篤宗盟則思推一

本以睦之念勲舊則思培後裔以酬之生聚蕃衍何以阜之人材蔚起何以牖之本計是圖審所先務斯則

皇考命纂是書之大本繼序者當敬承而罔斁也八旗人士尚念國恩之優厚先業之彪炳流風善俗之忠直而敦龐服官者竭股肱從戎者効臂指淳質之風引而弗替克篤前人成烈以長養其子孫國家無疆之休其永有賴夫

欽定中樞政考三十一卷八旗則例十二卷

乾隆三十七年工部尚書兼管兵部尚書公福隆  
安等奉

敕纂

臣等謹按是書凡八旗中樞政考十五卷分金石  
絲竹匏土草木八門綠營中樞政考十六卷分甲  
乙丙丁戊己庚辛壬癸十門八旗則例十二卷分  
忠孝廉節四門自乾隆二十九年修竣後至是復

加增纂書成刊布

欽定五軍道里表

不分卷

乾隆四十四年兵部尚書公福隆安等奉

敕纂

臣等謹按是書原名軍衛道里表乾隆八年纂輯告成嗣經大學士尹繼善奏請重修並以從前五等人犯係發衛所充軍是以定為軍衛道里表今軍犯俱交州縣收管衛所專司挽運漕糧並不收

管軍犯因改名五軍道里表至是復加增修書成  
刊布

歷代馬政志一卷

蔡方炳撰方炳見邦計類

歷代武舉考一卷

譚吉璉撰吉璉字丹石嘉興人官至登州府知府

右政書類軍政

大清律例四十七卷

乾隆五年大學士三泰徐本等奉

敕撰

皇上御製序曰象刑有典肇見虞書其用之之道則曰  
欽曰恤曰明曰允一篇之中三致意焉武王誥康叔  
以用其義刑義殺而呂刑則曰士制百姓于刑之中  
以教祇德古先哲王所謂設法飭刑布之象魏縣之  
門閭自朝廷達于邦國共知遵守者惟是適于義協  
于中弼成教化以洽其好生之德非徒示之禁令使



知所畏懼而已哉

列祖受

天明命撫綏萬邦頒行大清律例仁育義正各得其宜  
聖祖仁皇帝至仁如天化成久道德洋恩溥涵浹羣生  
皇考世宗憲皇帝際重熙累洽之運振起而作新之

親定大清律集解刊示中外甄陶訓迪刑期無刑法外之  
仁垂為

明訓有曰寬嚴之用必因乎其時洋洋

聖謨洵用法之權衡制刑之準則也朕寅紹

丕基恭承

德意深念因時之義期以建中于民簡命大臣取律文及  
遼年奏定成例詳悉參定重加編輯揆諸大臣準諸  
人情一本于至公而歸于至當折中損益為四百三  
十六門千有餘條凡四十七卷條分縷析倫敘秩然  
頒布宇內用昭畫一之守於戲五刑五用以彰天討  
而嚴天威予一人恭

天成命監

成憲以布于下民敢有弗欽雖然有定者律令無窮者情  
偽也易曰君子以明慎用刑而不留獄書曰式敬爾  
由獄以長我王國忠信之長慈惠之師尚其慎厥用  
敬厥由體欽恤明允之意率入於民棊彞克協于中  
以弼予祈

天永命允升于大猷從事于斯者胥懋敬哉是為序

臣等謹按順治初刑部尚書吳達海奉

詔詳考明律叅以

國制勒為成書康熙九年大學士管刑部尚書事對

喀納等奉

詔校正雍正元年大學士朱軾尚書查郎阿等奉

詔續成我

皇上御極之初即允尚書傅鼐之請

命廷臣攷正成編纂入定例凡一千餘條恭錄

世祖章皇帝御製原序

聖祖仁皇帝上諭

世宗憲皇帝御製序文

諭旨並我

皇上御序冠於簡端嗣是數載一修各以新定之例分  
附於後而於讞牘

奏陳復量情酌理

矜慎再三虞廷欽恤之風洵無加於此矣

欽定督捕則例二卷

乾隆八年大學士徐本等奉

敕纂

臣等謹按旗逃名例古所未有順治初創為則例

康熙十五年

命大學士索額圖校定至是重加釐正續纂成編

欽定三流道里表

不分卷

乾隆四十九年大學士公阿桂等奉

敕纂

臣等謹按是書自乾隆八年纂輯告成二十年復經修訂嗣因我

皇上德盛化神幅員廣闊增設郡邑既為舊表所未備即各直省府廳州縣亦有裁併增設因請

旨重輯書成刊布

右政書類法令

欽定工部工程做法七十四卷

雍正十二年和碩果親王允禮等奉

敕纂

臣等謹按工部營造規條多闕經制是編詳細編纂開卷瞭然信可以遵行而永守也

欽定工部則例五十卷

乾隆十四年大學士史貽直等奉

敕纂

臣等謹按是編因

乘輿儀仗金銀器皿應需雕刻漆金鍍鍍並布帛綵



繡縫緝等及一切器物所用工料向未詳定條規  
乃奏請編纂成書以昭畫一

欽定工部續增則例九十五卷

乾隆二十四年大學士史貽直等奉

敕纂

臣等謹按工部舊則例日久未修惟據事案辦理

工料銀數未免先後參差貽直等請

旨續纂輯成是編

欽定物料價值則例二百二十卷

乾隆三十三年大學士陳宏謀等奉

敕纂

臣等謹按乾隆元年經工部題定一切物料按照  
時價釐定章程編為四卷至是因各處款項不齊  
價值互異乃奏請輯為則例詳明纂核勒成是編  
武英殿聚珍板程式一卷

乾隆四十一年戶部侍郎金簡恭撰

臣等謹按沈括夢溪筆談載慶曆中布衣畢昇用膠泥刻字此活板之權輿也厥後王楨之易木板陸深之記鉛字法雖屢變究未精詳乾隆三十八年

詔修四庫全書復

命擇其善本校正剗刷嘉惠藝林簡因梨棗功繁

奏請以活字排印得

旨俞允

賜名聚珍行之三載力省功多簡因述其程式繪圖系  
說以為此書

浮梁陶正志一卷

吳允嘉撰允嘉見傳記類

右政書類考工

御製人臣儆心錄一卷

順治十二年

世祖章皇帝御撰

世祖章皇帝御製序曰朕惟人臣立身制行本諸一心心  
正則為忠為直衆美集焉不正則為奸為慝羣惡歸焉  
是故心者萬事之本美惡之所由出也顧事有殊塗心  
惟一致一于國則忘其家一于君則忘其身如此者不  
特名顯身榮邦家亦允賴之矣若夫奸邪之流樹黨營  
私怙權亂政卒至聲名俱喪為國厲階蓋緣居恒無正  
心之功一當勢利遂昏迷瞽亂狂肆驕矜上昧王章下  
乖臣誼或作威而聯羽翼或比匪而効奔趨如譚泰石

漢以累世舊臣久叨恩遇不思圖報逞臆橫行跋扈自恣目無綱紀陳名夏則一介豎儒驟蒙顯拔倚任深重賜資優隆而乃背德植交蔑法罔上此皆自作罪孽以致隕厥身家朕歷稽往古宵人誤國代代有之觀諸近事復炯鑒昭然足為永戒恐後之為臣者或仍蹈覆轍負主恩而渝素志至于身罹刑憲悔悼無由故推原情狀而論列之錄成一編以為人臣做心之訓云

臣等謹按是書取自漢迄宋姦臣惡跡

訓誡周詳彙為一冊普示班聯俾知炯鑒仰見

世祖章皇帝防微杜漸所以立千秋臣道之開示百爾保  
身之則者固甚深切而著明也

欽定訓飭州縣規條一卷

世宗憲皇帝御製序曰牧令為親民之官一人之賢否關  
係萬姓之休戚故自古以來慎重其選而朕之廣攬旁  
求訓勉告誡冀其奏循良之績以惠我烝黎者亦備極  
苦心矣惟是地方事務皆發端于州縣頭緒紛繁情偽

百出而膺斯任者類皆初登仕籍之人未練習于平時而欲措施於一旦無怪乎徬徨瞻顧心志茫然即採訪咨詢而告之者未必其盡言無隱此古人所以有學製美錦之歎也向以大學士朱軾左都御史沈近思外任多年周知地方利弊雍正二年曾令二臣商著規則以為州縣之南車乃書未就緒而沈近思物故邇年以來朱軾復時多病此事遂至遲延去年始降旨委諸總督田文鏡李衛令二臣各抒所見繕錄諸條以進朕親加



批覽見其條理詳明言辭剴切民情吏習罔不兼該大  
綱細目莫不備舉誠新進之津梁庶官之模範也在二  
臣各就其所閱歷者而言繁簡同異之間不必一致而  
慎守官方勤恤民隱興利除害易俗移風其大指則一  
而已矣爰就本文付之剞劂頒賜州縣官各一帙俾置  
之几案間朝夕觀覽省察提撕治效未臻必思所以勉  
之弊端未革必思所以去之本之以實心行之以實力  
毋始勤而終怠毋靜言而庸違如此則不但國家得司

牧之賢草野有父母之頌而爾等身膺顯擢叨被榮光  
福貽子孫名標史冊豈不美歟

欽定詞林典故八卷

乾隆九年大學士兼翰林院掌院學士鄂爾泰張  
廷玉等恭纂

皇上御製序曰詞林典故書成大學士張廷玉等以序  
請朕惟六經之士豈易言哉而况躋玉堂而列芸署  
者盡六經之彥也木天故事歷代沿革具見於斯則

又何言惟是國家重館閣之選極優遇之榮詎止蜚  
其英聲將以華國而已哉如濂溪所謂文以載道者  
舍是無他求夫布衣韋帶之士由立言以期不朽足  
矣若夫國家右文重道將以淑世熙績繼往聖之絕  
學開萬世之太平胥是賴焉名之盛者實難副任之  
大者責彌重譽之來者毀亦隨其尚思春華秋實之  
喻而凜虛車麟楨之譏哉

欽定國子監志六十二卷

乾隆四十三年戶部尚書梁國治等奉

敕撰

臣等謹按

本朝國子監及

文廟締構實始于元時國子祭酒陸宗楷等嘗輯太  
學志一書所述沿革兼及唐宋以前殊失限斷仰  
承

訓示重為校正斷自元初輯成此帙首

聖諭次

詣學次廟制次祀位次禮次樂次監制次官師次生徒  
次經費次金石次經籍次藝文而附以紀事綴聞  
二卷詳徵故實始末釐然讀是編者知

國家重道崇儒典隆制備四海之內學校如林庠序  
盈門者有自來也

欽定歷代職官表七十二卷

乾隆四十五年奉

敕編

臣等謹按是編詳述歷朝官制源流排次分目悉  
遵

今制每一曹司為一表表後詳敘建置首列

國朝畧如唐六典之例次及歷代凡今有而昔無昔  
有而今無與名同而實異實同而名異者並節引  
諸書詳為考證上下數千年分職率屬之制展卷  
瞭然且以見

聖朝董政之模遠邁唐虞之稽古矣

政學錄五卷

鄭瑞撰瑞字司直棗強人順治己亥進士官至江

南巡撫

歷代銓選志一卷

袁定遠撰定遠里貫未詳

歷代宰輔彙考八卷

萬斯同撰斯同見儀制類

銓政論畧一卷

蔡方炳撰方炳見政書類

文武金鏡律例指南十六卷

凌銘麟撰銘麟字天石杭州人

臣等謹按是書專為初仕者而設故于官階儀注  
莅任事宜莫不條律分明而于律例大旨尤重加  
發明焉

為政第一編八卷



孫鉉撰鉉字可菴錢塘人

百僚金鑑十二卷

牛天宿撰天宿字覲徽章邱人官瓊州府知府

南唐舊聞十六卷

黃叔璥撰叔璥見傳記類

臣等謹按王士禎分甘餘話云今都察院可稱南臺不可稱西臺叔璥是編乃記御史典故之書故取此義以南臺為名

右職官

右職官

皇朝文獻通考卷二百二十二